

Naalakkersuisut oqaatsinut kiffartuussivimmik pilersitseqqullugit aalajangiiffigisassatut siunnersuut. Oqaatsinik kiffartuussivik oqaatsinut siunnersortinik inuttaqassaaq, kalaallisut oqaatsitta atorneqarnerini nakkutilliiviussalluni aammalu siunnersuineramik neqeroorteqassalluni, tusagassiuutinili oqaatsitta atorneqarnissaannik ilinniartitsiffiusinnaassalluni.

(Inatsisartunut ilaasortaq Mimi Karlsen, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Aappassaaneerpeqarnera

Naalakkersuisut ataatsimiititaliap siunnersuutip suliarineranut qujapput maluginiarlugulu ataatsimiititaliap isumaqatigiittup siunnersuutip akuerineqarnissaa inassutigigaat.

Ataatsimiititaliap innersuussutigivaa Naalakkersuisut oqaatsinik kiffartuussiviup kiffartuussissutissanut najoqutassaanik suliaqarnermini tusagassiorfinnik peqataatitsigunik pissusissamisussasooq, taamaalillutik tusagassiorfiit nammineerlutik kissaataat pisariaqartitaallu ilanngunneqarniassammata. Naalakkersuisut tamanna qularnaarniarpaat aamma ataatsimiititaliap oqaaseqaataanut sinnerinut isumaqataapput.

Taamatut oqaaseqarlunga Naalakkersuisut innersuuppaat siunnersuut akuersissutigineqassasooq.